

# 名詩摘錄

▲詠靈光龜爪神弩 三元渭川陳希曾

浮江龜爪貢明廷。從此螺城藉鎮寧。甌貉百年傳國寶。仙遊一戰懾王靈。奸雄贅壻謀難測。婉戀兒娘怒未平。神弩果神機莫易。馬頭無事到滄溟。

●奉旨充如西使謝詩

自揣才疎齒未彊。星槎今復泛重洋。極知山海恩情重。那管東西道路長。萬里鐵城通異域。十年牛渚憶淪疆。小臣經濟何能補。賴有嘉猷出廟堂。

★輓二甲杏市黎克謹 進士大同武輝炬

全生未答忍全歸。聞信令人信復疑。半世功名身似夢。一篇忠義口皆碑。國恩甲第官爲使。家况親存子又癡。博得先生深許久。九原相見或怡怡。

●充清化場分考京回訪

大同武二甲 二甲書齋阮廷揚

未熟黃梁無是非。風塵得間便言歸。生離死別三年事。舊話新聞直北圻。草木荒寒孤栢立。江山高潔去秋違。山人不解謫仙况。每向樽前問紫微。

▲生日偶題

生吾天地是耶非。四十年來幾疾威。昔樹今花聊爾爾。長途重負尙依依。懸弧故宅霜應濕。奠藻窮山雲正飛。不逐秋風搖洛盡。寸心膚髮誓全歸。

◎答友人勸再仕書 三元安賂阮勸

十年回首獨愁予。世事人情甚不如。同類相看竹縛竹。利名無厭魚吞魚。試看今日誰爲梗。所以前人欲廢書。寄語城門相識者。風塵滿路未歸歟。



如西副使武文豹回棧戲贈

使星千里上車回。十八胡嬪解佩來。只恨平生知已少。故將懷抱向君開。洪荒俗尚何如者。鄰國風流有是哉。使命奇逢傳韻事。豈云不辱是人才。

副使武回棧贈影相偶題

八月歸棧公思寬。席前小影贈來看。輝煌佩服真爲巧。憂愛精神畫亦難。蟬鬢已隨霜雪改。鏡花遙帶海雲還。幸哉予影又公影。壁上高懸後日觀。

題昭皇女君廟

寶理鄧陳常

高惠辱庸國已亡。陳家累世秉朝綱。故教女主虛當璧。豈有兒童解竊香。信筆一言傳史氏。口碑千古罪昭皇。他年赤髻移人國。不見宮中九歲娘。

題東郭先生傳

二甲武洵

雞鶴羣中自不齊。豈應一一辦高低。齊王未必知賢者。庸衆安能識子兮。竊祿固知傷性直。濫

竿姑且試塵迷。至今三百人埋沒。惟有先生足品題。

題嚴陵瀨

高人此地屈英雄。千古芳名尚不窮。九鼎基圖成往昔。雙臺名價自西東。揚清長挹三江水。激濁頻迎七里風。物色至今存古瀨。茫茫烟水一冥鴻。

迎春

由公充河內巡撫時城被失守故有此作

返旆還師說不成。春郊春駕爲誰迎。可憐憂辱三時過。苦恨蹉跎一歲更。寒雨有聲催舊歲。東風無力到荒城。天添歲月人添壽。何日重看珥水清。

題蜀安陽王祠

舉人枚立政

無復靈龜出古螺。依然城郭與山河。前池春煥浮新水。古木叢深照晚霞。風俗別開蒲板國。宮臺猶認晉陽花。由來興廢尋常事。莫把朱顏謾叱嗟。